

LA FORMAZION DAL PATRIARCJÂT DI AQUILEE

Deventât provisorielementri imperadôr Berengari dal 915, lui no si dè nissun pinsîr dal Friûl e lu lassà in man a siei partesans, bogns di nuie, che plui tart lu tradirin, ma che a lassarin cori pe nestre tiere mandriis di Ongjars, ogni volte che ur saltà il grî di vignî.

No si sa un dret cetantis voltis che chescj cjastics di Diu si strucjarin ca in Friûl: al semee che a usassin spietâ, tra une incursion e chê altre, il timp che al bastave parcè che la int ur ves preparât alc altri di robâ. A vignivin pe solite strade di soreli jevât; a passavin fûr par mieç de Basse, dulà che e je inmò la Stradalte che, daspò di chê volte, e fo clamade Ongjaresche e dute la campagne disore e disot par un gran toc e cjapà il non di "vastata Ungarorum". Ma si pò crodi che dute la planure furlane e sei stade, ce pôc ce trop, dispueade e spopolade di chês sbilfis e che mai, in tancj secui di invasions e devastacions che a sopressarin il Friûl - nancje cun Atile - la nestre regjon no vebi presentât un spettacul di desolazion compagn. Si podarès, tant che si vûl, dividi la storie furlane in dôs parts; prime dai Ongjars e daspò dai Ongjars, parcè che, di dut ce che al jere stât fat prime, nol restà altri che i vanzums za sapulîts sot tiere, che i Ongjars no vevin timp di lâ a sgjavâ.

E fo une fortune pai paîs e pe int de Alte, di cjatâsi a jessi puars e fûr di man: cussì a forin sparagnâts ancje di cheste disgracie, midiant che i invasôrs no vevin timp di pierdi dulà che al jere pôc ce robâ e i parons a podevin resisti.

Dome su la mitât di chel secul l'imperadôr Oton al rivà adore di rompi lis cuestis ai Ongjars e di fermâ la tragjiche usance che a vevin cjapade.

Daspò de tampieste dai Ongjars il Friûl, dibot par cinc secui, al reste distacât dal ambient talian e al va a fâ part dal ream gjermanic. Si capîs che restant gjeograficamente di ca des monts, al restà ancje leât cul mont culturâl latin plui che no lis regjons di là de Donau, ma la sô vite politiche e fo chê di un stât feudâl todesc.

Cheste situazion e scomence a formâsi sot dal imperadôr Oton I. Il marchesât furlan, ridusût in maseriis e unît cu la marcje di Verone, al passe intes mans di Indrî di Baviere; e po il ducât de Carintie, cul Cragh, il Staiar, l'Istrie e il Friûl, al ven distacât de Baviere. Cussì l'Herzog di Carintie, al comande ancje de marcje veronese e de Furlanie, indulà che al comparîs, si e no, cualchi volte un cont che nol conte nuie. Chel che al conte simpri plui devant dal imperadôr al è il patriarcje di Aquilee.

Al veve za tacât Berengari a fâ cualchi donazion di terens al patriarcje Fidri (900/904); ma la prime investidure di une cierte impuartance e fo chê dal imperadôr Oton I, che dal 967 al meteve intes mans dal patriarcje Rodualt dut il teritori furlan tra la Stradalte e il mâr, di Cervignan fintremai ae Livence, cence contâ altris concessions ca e là. Une vore di donazions di terens e paîs al fasè ancje Oton II, tant a Rodualt che a Zuan, e in mò di plui Oton III, massime des bandis di Pleç, Tolmin, Gurize e sul Vipau.

Al ven a jessi che, intor dal an 1000, la jurisdizion dal Cont dal Friûl e jere dute semenade di possessions dal patriarcje e chestis a diventarin simpri plui largjis e numerosis, in maniere che la paronance dal cont, prime rote da tantis isulis di domini patriarcjâl, e finì, un pòc a la volte, cul ridusisi in cualchi isule pierdude tal teritori dependent dal patriarcje. Si sa che cheste e fo par dut la politiche dai trê Otons: meti lis jurisdizions feudâls intes mans di umigns de Glesie par no che diventassin ereditariis intes fameis dai conts e par podê tignî leâts cun cheste cjavece vescu e abâts.

In chest timp une largje fasse di teritori disore e disot de Stradalte e scomence a popolâsi di paisuts che a an un non sclâf: Guriç, Guricize, Gradiscje, Gradiscjute, Rividiscje, Stracis, Bielgrât, Sante Marize, Sante Mariçute, Vuirc, Listize, Çumpicje, Sclaunic, Samardencje e vie indenant. Cheste e jere la part de Furlanie che e veve patît di plui par vie dai Ongjars: si viôt che in chei sîts al veve di sei restât dibot un desert e che i Sclâfs des monts a soreli jevât, o invidâts, o lassâts vignî dai patriarcjis, a capitarin a tornâju a popolâ. E chescj paîs, par ordin che a nassevin, a passavin sot la jurisdizion dai stes patriarcjis (diplome di Oton III al patriarcje Zuan, 1001).

Fintremai al timp dal patriarcje Popon no si pò dî cun sigurece di ce nature e cun ce estension che e fos cheste jurisdizion: se al cont al restàs in mò cualchi drit o nuie. Ma cun Popon (1019 - 1042) la cusion si definìs, parcè che dal 1027 l'imperadôr Conrât II al declarà che i paîs, i cjistiei, i terens, e lis personis che a jerin sot dal patriarcje no dipendevin in nissune maniere ni da conts, ni da marchês, ni da funzionaris imperiâi: al ven a jessi che il Patriarcje al jere feudatari di prin grât, dipindint nome e diretementi dal Imperadôr; cun di plui il stes Conrât al dave a Popon il drit di bati monede, che al vignive a significâ une vere sovranitât. Cussì si pò dî che il principât temporâl dai patriarcjis di Aquilee al jere nassût.

Josef Marchet - da "Cuintristorie dal Friûl" 1951